



REPUBLIKA E SHQIPËRISË

MINISTRIA E FINANCAVE

DREJTORIA E PËRGJITHSHME E HARMONIZIMIT TË KONTROLLIT
TË BRENDSHËM FINANCIAR PUBLIK
DREJTORIA E HARMONIZIMIT PËR AUDITIMIN E BRENDSHËM

Nr 17058

DT. 10.12.15

URDHËR

Nr. 86, Datë 10.12.2015

“PËR

MIRATIMIN E KODIT TË ETIKËS PËR AUDITUESIT E BRENDSHËM NË
SEKTORIN PUBLIK”

Në mbështetje të nenit 102, pika 4, të Kushtetutës të Republikës së Shqipërisë, gërma “c” e nenit 8 dhe gërma “c” e nenit 23, të ligjit nr.114/2015, datë 22.10.2015 “Për auditimin e brendshëm në sektorin publik”;

URDHËROJ:

1. Miratimin e Kodit të Etikës për Audituesit e Brendshëm në Sektorin Publik, sipas tekstit që i bashkëlidhet këtij urdhri.
2. Ngarkohet struktura përgjegjëse e harmonizimit për auditimin e brendshëm dhe të gjitha njësitë e auditimit të brendshëm në sektorin publik, për zbatimin e tij.

Ky Urdhër hyn në fuqi menjëherë.

SHKËLQIM CANI

MINISTËR



REPUBLIKA E SHQIPËRIË

MINISTRIA E FINANCAVE

**DREJTORIA E PËRGJITHSHME E HARMONIZIMIT TË KONTROLLIT
TË BRENDSHËM FINANCIAR PUBLIK
DREJTORIA E HARMONIZIMIT PËR AUDITIMIN E BRENDSHËM**

KODI I ETIKËS

PËR AUDITUESIT E BRENDSHËM NË SEKTORIN PUBLIK

Kodi i Etikës, i bazuar në Kodin e Etikës të Institutit Ndërkombëtar të Audituesve të Brendshëm (IIA), përmban parimet që rregullojnë sjelljen e audituesve të brendshëm në njësitë publike në kryerjen e shërbimit të auditimit të brendshëm. Ky dokument përshkruan kërkesat minimale për sjelljen dhe pritshmëritë e sjelljes të audituesve të brendshëm, pra nuk përfshin aktivitete të veçanta të veprimtarisë audituese.

I. QËLLIMI I KODIT TË ETIKËS

Kodi i Etikës ka për qëllim të promovojë një kulturë etike në profesionin e auditimit të brendshëm. Kodi i Etikës është i nevojshëm dhe i përshtatshëm për profesionin e auditimit të brendshëm, i krijuar për të vendosur besimin dhe sigurimin objektiv në lidhje me qeverisjen, menaxhimin e riskut dhe kontrollin.

Auditimi i brendshëm është një veprimtari e pavarur, që jep siguri objektive, si dhe ofron këshillim për menaxhimin, e projektuar për të shtuar vlerën dhe për të përmirësuar veprimtarinë e njësisë publike. Auditimi i brendshëm ndihmon njësinë publike për të arritur objektivat, nëpërmjet një veprimtarie të disiplinuar dhe sistematike, për të vlerësuar e përmirësuar frytshmërinë e menaxhimit të riskut, si dhe proceset e kontrollit dhe të qeverisjes.

Ky kod, shtrihet përtej përkufizimit të auditimit të brendshëm dhe përfshin dy komponentë thelbësor:

- 1) Parimet, të cilat janë të përshtatshme për profesionin dhe praktikën e auditimit të brendshëm;
- 2) Rregullat e mirësjelljes, duke përfshirë normat dhe sjelljen që pritët nga audituesit e brendshëm. Këto rregulla ndihmojnë në interpretimin e parimeve për zbatimin praktik të tyre dhe kanë si qëllim të udhëzojnë sjelljen etike të audituesve të brendshëm.

Auditues i brendshëm, është profesionisti, i kualifikuar dhe certifikuar sipas kërkesave të përcaktuara në aktet ligjore dhe nënligjore në fuqi dhe që kryen shërbimin e auditimit të brendshëm, në përputhje me përkufizimin e auditimit të brendshëm.

II. FUSHA E VEPRIMIT

Kodi i Etikës, zbatohet si për audituesit e brendshëm, ashtu edhe për njësitë që ofrojnë shërbime të auditimit të brendshëm.

Për të gjithë audituesit e brendshëm të certifikuar në detyrë, shkeljet e Kodit të Etikës do të vlerësohen dhe administrohen sipas akteve ligjore në fuqi.

III. PARIMET DHE RREGULLAT E SJELLJES

PARIMET

1. Integriteti

Integriteti i audituesve të brendshëm krijon besimin dhe në këtë mënyrë siguron bazën për mbështetje të gjykimin të tyre.

2. Objektiviteti

Audituesit e brendshëm shfaqin nivelin më të lartë të objektivitetit profesional në mbledhjen, vlerësimin dhe komunikimin e informacionit në lidhje me aktivitetin ose procesin që auditohet. Audituesit e brendshëm kryejnë vlerësim të balancuar të të gjithave rrethanave përkatëse dhe nuk ndikohen nga interesat e tyre personale ose nga të tjerët në nxjerrjen e konkluzioneve dhe në dhënien e rekomandimeve.

3. Konfidencialiteti

Audituesit e brendshëm duhet të respektojnë vlerat dhe pronësinë e të dhënave që mbledhin dhe të mos zbulojnë ndonjë informacion nëse ata nuk kanë autoritetin ose një detyrim ligjor ose profesional për ta bërë këtë.

4. Kompetencë

Audituesit e brendshëm duhet të zbatojnë dhe përdorin njohuritë, aftësitë dhe përvojën në ofrimin e shërbimit të auditimit të brendshëm.

RREGULLAT E SJELLJES

1. Integriteti

Audituesit e brendshëm:

- 1.1. Duhet të kryejnë punën e tyre me ndershmëri, zell dhe përgjegjësi;
- 1.2. Duhet të respektojnë ligjin dhe të bëjnë dhënien e informacioneve shpjeguese të udhëhequra nga ligji dhe profesioni;
- 1.3. Nuk duhet me vetëdije të jenë palë në ndonjë aktivitet të paligjshëm ose të angazhohen në akte që janë diskredituese për profesionin e auditimit të brendshëm ose të organizatës;
- 1.4. Duhet të respektojnë dhe kontribuojnë në arritjen e objektivave legjitime dhe etike të njësisë publike.

2. Objektiviteti

Audituesit e brendshëm:

- 2.1. Nuk duhet të marrin pjesë në asnjë aktivitet ose marrëdhënie që mund të dëmtojë ose parashikon të dëmtojë vlerësimin e paanshëm. Kjo pjesëmarrje përfshin ato veprimtari që mund të jenë në konflikt me interesat e njësisë publike.
- 2.2. Nuk duhet të pranojnë asgjë që mund të dëmtojë ose parashikon të dëmtojë gjykimin profesional.
- 2.3. Duhet të raportojnë të gjitha faktet e njohura prej tyre, të cilat nëse nuk zbulohen shkaktojnë shtrembërim të raportimit të procesit nën auditim.

3. Konfidencialiteti

Audituesit e brendshëm:

- 3.1. Duhet të jenë të kujdesshëm në përdorimin dhe ruajtjen e informacionit të mbledhur gjatë veprimtarisë së auditimit të brendshëm.
- 3.2. Nuk duhet të përdorin informacionin për përfitime personale apo ndonjë formë tjetër, në kundërshtim me ligjin ose që cënon objektivat legjitime dhe etike të njësisë që auditohet.

4. Kompetenca

Audituesit e brendshëm:

- 4.1. Duhet të angazhohet vetëm në veprimtarinë audituese, për të cilën ata kanë njohuritë e nevojshme, kompetencën dhe përvojë e duhur.
- 4.2. Duhet të kryejë veprimtarinë e auditimit të brendshëm në përputhje me kuadrin rregullator të auditimit të brendshëm dhe të Standardeve Ndërkombëtare për Praktikën Profesionale të Auditimit të Brendshëm (IPPF), të pranuar për t'u zbatuar.
- 4.3. Duhet vazhdimisht të përmirësojnë aftësitë e tyre dhe efektivitetin e cilësinë e shërbimeve të tyre.

Kërkesë e Sektorit Publik

Audituesit e brendshëm, të cilët punojnë në sektorin publik, përveç njohjes së kërkesave të këtij Kodi Etik, duhet të kenë parasysh dhe legjislacionin në fuqi për rregullat e etikës në administratën publike.